

Radix lignosa, crassa, crassitie sæpe duorum pollicum, profundissime ultra pedem unum vel alterum descendens, valde inæqualis, perennis, supra terram adscendens, tortuosissima, varic divisa.

Caulis lignosus, varic basi divisi, tortuosi, copiosi, depressi, breves, perennes. *Rami* steriles consimiles, ab initio pubescentes, perennes.

Frustrificantes adscendentes, interdum erecti, digitales usque pedales, recti, simplices; interdum ramulis alternis patentibus obsiti, annui.

Folia in inferioribus caulibus & ramis sterilibus linearia, subacuta, inermia, supra linea sulcata, brevia, sparsa, cum fasciculo foliorum ex alis, interdum glabra, sæpius levissime pubescentia.

Flores spicati, alterni, sparsi, solitarii, totos ramos occupantes, sessiles.

Bractea singulo flori tres, dorsali reliquis includente, ovata, acuminata, concava, flore paulo breviores: lateralibus magis carinatis, æqualibus.

CAL. *Perianthium* pentaphyllum: foliolis ovatis, basi membranaceis, concavis, erectis, apice tempore florentiæ acutis absque membrana.

COR. nulla.

STAM. *Filamenta* quinque, calyce paulo altiora, setacea, planiuscula. *Anthera* oblonga, ad medium ex basi bifurcata.

PIST. *Germen* ovatum, paulo compressum, desinens in stylum crassiusculum, superius leviter bifidum. *Stigmata* acuta.

PER. *Capsula* ovata, acuminata, unifocularis, tecta calyce h. t. aucto foliolis quinque, membranaceis, subrotundis, latissimis, integerrimis, tenuissimis, cornei coloris, supra medium Calycis affixis.

SEM. unicum, subrotundum, depressum, convexum, spirale.

Color Plantæ & florum herbaceo-cinereus, demum albo incanus. *Floret* ad medium mensis Augusti, fructificat in Octobri.